

Pravilnik o službenoj odjeći carinskih službenika

Pravilnik je objavljen u "Službenom listu CG", br. 60/2016 od 23.9.2016. godine, a stupio je na snagu 1.10.2016.

Predmet

Član 1

Ovim pravilnikom propisuje se izgled, vrsta, trajanje i način upotrebe službene odjeće carinskih službenika.

Nošenje službene odjeće

Član 2

Carinski službenici nose službenu odjeću prilikom obavljanja:

- carinskih poslova u graničnim i unutrašnjim carinskim ispostavama;
- poslova unutrašnje i naknadne kontrole, revizije, suzbijanja krijumčarenja, obavještajnog rada i istraga.

Službenu odjeću nose carinski službenici raspoređeni na radno mjesto:

- 1) načelnik Odjeljenja za unutrašnju kontrolu;
- 2) načelnik Odjeljenja za reviziju;
- 3) načelnik Odsjeka za suzbijanje krijumčarenja;
- 4) načelnik Odsjeka za obavještajni rad;
- 5) načelnik Odsjeka za naknadnu kontrolu;
- 6) načelnik Odsjeka za istrage;
- 7) upravnik;
- 8) šef ispostave;
- 9) pomoćnik šefa ispostave;
- 10) samostalni carinski inspektor I, II, III;
- 11) viši carinski inspektor I, II, III;
- 12) carinik-viši saradnik I, II, III;
- 13) samostalni carinik;
- 14) carinik;
- 15) mlađi carinik.

Službenu odjeću u zavisnosti od prirode i potreba posla nose i drugi carinski službenici.

Vrste i djelovi službene odjeće

Član 3

Službena odjeća carinskih službenika je:

- svečano odijelo;
- carinska uniforma;
- radno odijelo.

Carinska uniforma je zimska i ljetnja, muška i ženska.

Radno odijelo je muško i žensko.

Zimska carinska uniforma nosi se od 15. oktobra do 31. marta, a ljetnja od 1. aprila do 14. oktobra kalendarske godine.

Radno odijelo se nosi zavisno od prirode posla i uslova rada.

Zavisno od klimatskih prilika, zimska, odnosno ljetnja carinska uniforma može se nositi van perioda iz stava 4 ovog člana.

Carinski službenici koji nose službenu odjeću, poslove mogu obavljati i u civilnoj odjeći u zavisnosti od prirode i vrste posla.

Svečano odijelo

Član 4

Djelovi svečanog odijela su:

- 1) kapa (muška i ženska, svečana);
- 2) sako muški i ženski;
- 3) pantalone muške;
- 4) suknja;
- 5) košulja dugih rukava muška i ženska;
- 6) kravata muška;
- 7) ešarpa ženska;
- 8) cipele plitke muške i ženske;
- 9) čarape muške i ženske;
- 10) kaiš muški i ženski;
- 11) pojas;
- 12) ekselebender;
- 13) rukavice.

Muško svečano odijelo

Član 5

Kapa je svečana šapka, sa štitom okruglog oblika, izrađena od tkanine tamno-sive boje. Na prednjoj strani iznad štita je traka zlatnog veza u dužini štita, na čijim se završecima nalaze zlatna dugmad sa utisnutim grbom Crne Gore. Po sredini kape, iznad štita nalazi se službena značka organa uprave nadležnog za poslove carina (u daljem tekstu: Uprava).

Sako je tamno-sive boje koji prati liniju tijela i blago je ukrojen. Dužina sakoa prekriva 2/3 bedara. Jednorednog je kopčanja sa četiri metalna dugmeta na kojima je gravura grba Crne Gore u zlatno - žutoj boji. Na prednjoj strani sakoa, sa lijeve i desne strane, ušiveni su džepovi sa poklopcima u bordo boji. Na lijevom gornjem dijelu nalazi se džep na kojem je ušiveno dugme zlatno - žute boje za koje se kači ekselebender. Na lijevoj strani sakoa, ispod džepa, nalazi se našivak sa dvije metalne rupice za službenu značku. Okovratnik i rever su visoko pozicionirani i ostavljaju strožiji utisak forme. Na početku rukava su postavljena po četiri metalna dugmeta sa utisnutim grbom Crne Gore u zlatno - žutoj boji i trakama zlatno - žute boje. Na gornjem dijelu lijevog rukava prišiven je amblem Uprave. Na ramenima se nalaze naramenice u bordo boji na koje se navlače epotele. Naramenice se kopčaju sa po jednim metalnim dugmetom sa utisnutim grbom Crne Gore u zlatno - žutoj boji, veličine kao na rukavima. Sirovinski sastav može biti vuna 98% i elastin 2%. Postava je od viskoze.

Pantalone su u istoj tkanini kao i sako, tamno sive boje, kroj koji prati figuru i liniju noge, a sa strane noge, u šavu, imaju smoking liniju. Na nogavicama sa strane, po sredini, imaju bordo traku širine do 5 mm, i iste su bez manžetni. Sa strane pantalona su postavljena dva kosa džepa i dva ušivena džepa pozadi koji se kopčaju dugmadima. Na pojasu se nalaze gajke za kaiš, a u predjelu pasa jedno dugme i skriveni patent zatvarač. Pantalone su postavljene do koljena. Sirovinski sastav može biti vuna 98% i elastin 2%, a postava je od viskoze.

Košulja je dugih rukava bijele boje, blago strukirana sa džepom na lijevoj strani.

Kravata je od fino izrađene tkanine u bordo boji i ima vez u zlatnoj boji, uzorak motiva sa muškog dijela nacionalne nošnje.

Cipele su od prirodne kože, crne boje, visokog sjaja, sa kožnim đonom koji je presvučen gumom i prošiven, na pertlanje i standardnom potpeticom.

Čarape su klasične, crne boje, od prirodnog materijala, duže.

Kaiš za pantalone je od kvalitetne kože, klasičnog oblika, širine od 30 mm, crne boje, koji se kopča metalnom kopčom.

Pojas je izrađen od visoko kvalitetne prirodne kože, klasičnog oblika, širine od 35-40 mm, u bordo boji, oivičen zlatno - žutim vezom, sa metalnom kopčom pravougaonog oblika u zlatno - žutoj boji, na kojoj je otisnut službeni znak Uprave carina.

Ekselebender je trostruki gajtan sintetičkog sastava sa metalnim završecima zlatno - žute boje.

Rukavice su od prirodnog materijala, klasičnog oblika sa prstima, bijele boje.

Žensko svečano odijelo

Član 6

Kapa je šešir, koji je na krajevima blago savijen, ovalnog oblika, izrađena od tkanine tamno-sive boje. Na prednjoj strani, iznad oboda, nalazi se traka zlatnog veza iznad koje se na prednjoj strani nalazi službena značka Uprave.

Sako je istog izgleda kao i muški, i ženskog je kroja. Dužina sakoa prekriva 2/3 bedara.

Suknja je od tkanine tamno sive boje kao i sako, i prati figuru tijela, a u bočnom dijelu ima bordo traku, širine do 5mm. Dužina suknje je do ispod koljena, sa šlicem pozadi, sa pređicama za kaiš, bez džepova. Kopčanje je pozadi rajsfešlusom.

Košulja je dugih rukava bijele boje, blago strukirana sa džepom na lijevoj strani.

Ešarpa ženska je kvadratnog oblika, bordo boje, promjera 40x40 cm, koja u uglu ima uzorak motiva veza sa muškog dijela nacionalne nošnje u zlatnoj boji, koja se veže visoko uz vrat.

Cipele su od prirodne kože, crne boje, visokog sjaja, sa kožnim đonom koji je presvučen gumom i prošiven, sa

potpeticom srednje visine.

Čarape su svilene u boji kože.

Kaiš je od kvalitetne kože, klasičnog oblika, širine od 20 mm crne boje, koji se kopča metalnom kopčom.

Pojas je izrađen od visoko kvalitetne prirodne kože, klasičnog oblika, širine od 30-35 mm, u bordo boji, oivičen zlatno - žutim vezom, sa metalnom kopčom pravougaonog oblika u zlatno - žutoj boji, na kojoj je otisnut službeni znak Uprave.

Ekselebander je trostruki gajtan sintetičkog sastava sa metalnim završecima zlatno - žute boje.

Rukavice su od prirodnog materijala, klasičnog oblika sa prstima, bijele boje.

Korišćenje svečanog odijela

Član 7

Svečano odijelo koriste rukovodioci organizacionih jedinica, i to :

-direktor Uprave carina;

-pomoćnik direktora;

-upravnik;

-načelnik.

Ostali carinski službenici koriste svečano odijelo u skladu sa odlukom direktora Uprave carina.

Svečano odijelo se nosi u svečanim prilikama.

Nošenje svečanog odijela u drugim prilikama vršiče se u skladu sa odlukom direktora Uprave carina.

Zimska carinska uniforma

Član 8

Zimska carinska uniforma sastoji se od:

1) kape muške i ženske;

2) sakoa muškog i ženskog;

3) pantalona muških i ženskih:

4) suknje;

5) pulovera muškog i ženskog;

6) košulje dugih rukava muške i ženske;

7) kravate muške;

8) ešarpe ženske;

9) cipela plitkih i dubokih muških i ženskih;

10) čarapa muških i ženskih;

11) kaiša muškog i ženskog;

12) opasača;

13) rukavica.

Muška carinska uniforma (zimski)

Član 9

Kapa je šapka ovalnog oblika, tamno sive boje, prilagođena zimskim uslovima, sastavljena od štitnika i kape koja je ivicom prošivena na pasu kape. Sa spoljašnje strane prošivena je traka crne boje sa stilizovanom pletenicom u zlatnoj ili srebrnoj boji, zavisno od zvanja. Štitnik je izrađen od plastične mase, sa gornje strane presvučen lakiranim politeksom u crnoj boji, zajedno prišiven na pasu kape sa znojnicom. Na prednjem dijelu kape, u sredini, nalazi se službena značka Uprave. U unutrašnjem dijelu šapke nalazi se elastična traka tamno sive boje.

Sako je od zimskog štofa, tamno sive boje, koji prati liniju tijela i blago je ukrojen, sa reverom koji je visoko pozicioniran, jednorednog kopčanja sa tri dugmeta, sa epoletama u boji sakoa. Sa prednje strane u lijevom gornjem dijelu nalazi se ušiveni džep na kojem je našiven službeni znak Uprave carina. Sa lijeve i desne strane u donjem dijelu nalaze se ušiveni džepovi sa poklopcem.

Na rukavima, koji su na krajevima blago prorezani nalaze se četiri ušivena dugmeta. Dugmad su usklađena sa bojom odijela. Sirovinski sastav može biti najmanje vuna 80% i 20% materijala sintetičkog porijekla. Postava je od viskoze.

Pantalone su od zimskog štofa, u istoj tkanini kao i sako, tamno sive boje, kroja koji prati figuru i liniju noge. Nogavice su bez manžetni. Sa strane pantalona su postavljena dva kosa džepa i dva ušivena džepa pozadi koji se kopčaju dugmadima. Na pojasu se nalaze gajke za kaiš, a u predjelu pasa jedno dugme i skriveni patent zatvarač. Pantalone su postavljene do koljena. Sirovinski sastav može biti vuna najmanje 60% i 40% materijala sintetičkog porijekla. Postava je od viskoze.

Pulover je blago strukiran, od viskozne trikotaže u tamno sivoj boji, sa V izrezom.

Košulja dugih rukava, je blago strukirana, u svijetlo sivoj boji, izrađena od prirodnog materijala, sa sirovinskim sastavom od 98% pamuka i 2% elastina radi bolje pokretljivosti. U prednje gornjem dijelu sa lijeve strane nalazi se džep.

Kravata je od fino izrađene tkanine u sivoj boji.

Cipele su duboke, kožne, postavljene prirodnom kožom, nepromočive, crne boje, sa debljim đonom od gume koji je prošiven, na pertlanje.

Čarape su deblje od prirodnog materijala, klasične, crne boje.

Kaiš za pantalone je od kvalitetne kože, klasičnog oblika, širine od 30 mm, crne boje, koji se kopča metalnom kopčom.

Rukavice su kožne, klasičnog oblika sa prstima, crne boje.

Ženska carinska uniforma (zimska)

Član 10

Kapa ženska je šešir. Šešir je toka ovalnog oblika tamno sive boje, od prirodnog materijala, koja je sa strane blago izvijena na gore, sa stilizovanom pletenicom u zlatnoj ili srebrnoj boji, zavisno od zvanja. Na prednjoj strani, u središnjem dijelu, nalazi se službena značka Uprave.

Sako je od zimskog štofa, tamno sive boje, strukiran, visokih revera, i jednorednog kopčanja sa tri dugmeta, sa epoletama u boji sakoa. Sa prednje strane u lijevom gornjem dijelu nalazi se ušiveni džep na kojem je našiven službeni znak Uprave. Sa lijeve i desne strane u donjem dijelu nalaze se ušiveni džepovi sa poklopcem. Na rukavima, koji su na krajevima blago prorezani nalaze se četiri ušivena dugmeta. Dugmad su usklađena sa bojom odijela. Sirovinski sastav može biti najmanje vuna 80% i 20% materijala sintetičkog porijekla. Postava je od viskoze.

Pantalone su od zimskog štofa, u istoj tkanini kao i sako, tamno sive boje, kroja koji prati figuru i liniju noge. Nogavice su bez manžetni. Sa strane pantalona su postavljena dva kosa džepa. Na pojasu se nalaze gajke za kaiš, a u predjelu pasa jedno dugme i skriveni patent zatvarač.

Pantalone su postavljene do koljena. Sirovinski sastav može biti vuna 60% i 40% materijala sintetičkog porijekla. Postava je od viskoze.

Suknja je od zimskog štofa, tamno sive boje kao i sako, i prati figuru tijela. Dužina suknje je do koljena, sa šlicem pozadi, sa predicama za kaiš, bez džepova. Kopčanje je pozadi rajsfešlusom.

Sirovinski sastav može biti vuna 60% i 40% materijala sintetičkog porijekla. Postava je od viskoze.

Pulover je strukiran, od viskozne trikotaže u tamno sivoj boji, sa V izrezom Košulja dugih rukava, je strukirana, u svijetlo sivoj boji, izrađena od prirodnog materijala, sa sirovinskim sastavom od 98% pamuka i 2% elastina radi bolje pokretljivosti.

Ešarpa ženska je kvadratnog oblika, sive boje, od prirodnog materijala, promjera 40x40 cm, koja se veže visoko uz vrat.

Cipele su duboke, kožne, postavljene prirodnom kožom, nepromočive, crne boje, sa debljim đonom od gume koji je prošiven, na pertlanje

Čarape su deblje, od prirodnog materijala, klasične, crne boje.

Kaiš je od kvalitetne kože, klasičnog oblika, širine od 20 mm crne boje, koji se kopča metalnom kopčom.

Rukavice su kožne, klasičnog oblika sa prstima, crne boje.

Ljetnja carinska uniforma

Član 11

Ljetnja carinska uniforma sastoji se od:

- 1) kape muške i ženske;
- 2) sakoa muškog i ženskog;
- 3) pantalona muških i ženskih;
- 4) suknje;
- 5) košulje kratkih rukava muške i ženske;
- 6) kravate muške;
- 7) ešarpe ženske;
- 8) cipela plitkih muških i ženskih;
- 9) čarapa muških i ženskih;
- 10) kaiša muškog i ženskog.

Muška carinska uniforma (ljetnja)

Član 12

Kapa je šapka ovalnog oblika, tamno sive boje, izrađena od laganog materijala prilagođena ljetnjem periodu, sastavljena od štitnika i kape koja je ivicom prošivena na pasu kape. Sa spoljašnje strane prošivena je traka crne boje sa stilizovanom pletenicom u zlatnoj ili srebrnoj boji, zavisno od zvanja. Štitnik je izrađen od plastične mase, sa gornje strane presvučen lakiranim politeksom u crnoj boji, zajedno prišiven na pasu kape sa znojnicom. Na prednjem dijelu kape, u sredini, nalazi se službena značka Uprave. U unutrašnjem dijelu šapke nalazi se elastična traka tamno sive boje

Sako je od ljetnjeg štofa, tamno sive boje, koji prati liniju tijela i blago je ukrojen, sa reverom koji je visoko pozicioniran, jednorednog kopčanja sa tri dugmeta, sa epoletama u boji sakoa. Sa prednje strane u lijevom gornjem dijelu nalazi se

ušiveni džep na kojem je našiven službeni znak Uprave. Sa lijeve i desne strane u donjem dijelu nalaze se ušiveni džepovi sa poklopcem. Na rukavima, koji su na krajevima blago prorezani nalaze se četiri ušivena dugmeta. Dugmad su usklađena sa bojom odijela. Sirovinski sastav može biti najmanje vuna 60% i 40% materijala sintetičkog porijekla. Postava je od viskoze.

Pantalone su od ljetnjeg štofa, u istoj tkanini kao i sako, tamno sive boje, kroja koji prati figuru i liniju noge. Nogavice su bez manžetni. Sa strane pantalona su postavljena dva kosa džepa i dva ušivena džepa pozadi koji se kopčaju dugmadima. Na pojasu se nalaze gajke za kaiš, a u predjelu pasa jedno dugme i skriveni patent zatvarač. Pantalone su postavljene do koljena. Sirovinski sastav može biti vuna 60% i 40% materijala sintetičkog porijekla. Postava je od viskoze.

Košulja je kratkih rukava, blago strukirana, u svijetlo sivoj boji, sa epoletama. Na prednjoj strani, sa lijeve i desne strane, našivena su dva džepa sa poklopcem i prorezom za olovku. Na lijevom rukavu našiven je službeni znak Uprave. Košulje su izrađene od prirodnog materijala, sa sirovinskim sastavom od 98% pamuka i 2% elastina radi bolje pokretljivosti.

Kravata muška je od fino izrađene tkanine u sivoj boji .

Cipele su plitke, kožne sa kožnim đonom koji je presvučen gumom i prošiven, postavljene prirodnom kožom, crne boje, na pertlanje, sa standardnom potpeticom.

Čarape su tanke od prirodnog materijala, klasične, crne boje.

Kaiš za pantalone je od kvalitetne kože, klasičnog oblika, širine od 30 mm, crne boje, koji se kopča metalnom kopčom.

Ženska carinska uniforma (ljetnja)

Član 13

Kapa je šešir. Šešir je toka ovalnog oblika tamno sive boje, prilagođena ljetnim uslovima, od prirodnog materijala, koji je sa strane blago izvijena na gore, sa stilizovanom pletenicom u zlatnoj ili srebrnoj boji, zavisno od zvanja. Na prednjoj strani, u središnjem dijelu, nalazi se službena značka Uprave.

Sako je od ljetnjeg štofa, tamno sive boje, strukiran, visokih revera, i jednorednog kopčanja sa tri dugmeta, sa epoletama u boji sakoa. Sa prednje strane u lijevom gornjem dijelu nalazi se ušiveni džep na kojem je našiven službeni znak Uprave. Sa lijeve i desne strane u donjem dijelu nalaze se ušiveni džepovi sa poklopcem. Na rukavima, koji su na krajevima blago prorezani, nalaze se četiri ušivena dugmeta. Dugmad su usklađena sa bojom odijela. Sirovinski sastav može biti najmanje vuna 60% i 40% materijala sintetičkog porijekla. Postava je od viskoze.

Pantalone su od ljetnjeg štofa, u istoj tkanini kao i sako, tamno sive boje, kroja koji prati figuru i liniju noge. Nogavice su bez manžetni. Sa strane pantalona su postavljena dva kosa džepa. Na pojasu se nalaze gajke za kaiš, a u predjelu pasa jedno dugme i skriveni patent zatvarač.

Pantalone su postavljene do koljena. Sirovinski sastav može biti vuna 60% i 40% sintetičkog porijekla. Postava je od viskoze.

Suknja je od ljetnjeg štofa, tamno sive boje kao i sako, i prati figuru tijela. Dužina suknje je do koljena, sa šlicem pozadi, sa predicama za kaiš, bez džepova. Kopčanje je pozadi rajsfešlusom.

Sirovinski sastav može biti vuna 60% i 40% sintetičkog porijekla. Postava je od viskoze.

Košulja je kratkih rukava, blago strukirana, u svijetlo sivoj boji, sa epoletama. Na prednjoj strani, sa lijeve i desne strane, našivena su dva džepa sa poklopcem i prorezom za olovku. Na lijevom rukavu našiven je službeni znak Uprave. Košulje su izrađene od prirodnog materijala, sa sirovinskim sastavom od 98% pamuka i 2% elastina radi bolje pokretljivosti.

Ešarpa je kvadratnog oblika, sive boje, od prirodnog materijala, promjera 40x40 cm, koja se veže visoko uz vrat.

Cipele su kožne salonke, sa kožnim đonom koji je presvučen gumom i prošiven, postavljene prirodnom kožom, crne boje, sa standardnom potpeticom

Čarape su tanke, od prirodnog materijala, u boji kože.

Kaiš je od kvalitetne kože, klasičnog oblika, širine od 20 mm crne boje, koji se kopča metalnom kopčom.

Radno odijelo

Član 14

Radno odijelo sastoji se od:

- 1) vjetrovke muške i ženske;
- 2) jakne muške i ženske sa termo uloškom koji se skida;
- 3) džempersa muškog i ženskog;
- 4) pantalona muških i ženskih sa termo uloškom koji se skida;
- 5) košulja muških i ženskih kratkih rukava;
- 6) košulja muških i ženskih dugih rukava;
- 7) majice polo muške i ženske dugih rukava;
- 8) majice polo muške i ženske kratkih rukava;
- 9) majice muške i ženske kratkih rukava;
- 10) kape - kačketa;
- 11) kape - vunene;
- 12) cipela muških i ženskih dubokih i poludubokih;

- 13) kišne kabanice;
- 14) čarapa;
- 15) kaiš;
- 16) rukavica;
- 17) radnih rukavica;
- 18) kombinezona sa termo uloškom koji se skida.

Muško radno odijelo

Član 15

Vjetrovka je sa uloškom i kapuljačom, vodootporna je i kopča se sa rajsferšlusom. Na zadnjoj strani vjetrovke, ispod kragne, nalazi se kapuljača koja se kopča dugmadima. Na prednjem gornjem dijelu vjetrovke, sa lijeve i desne strane, skrivena su ušivena dva džepa, a na donjem dijelu, sa lijeve i desne strane, su našivena dva džepa sa poklopcima koji se kopčaju "čičak" trakom. Na lijevom prsnom dijelu vjetrovke našiven je službeni znak Uprave, rukavi se završavaju manžetnama koje se zakopčavaju "čičak" trakom. Na leđnom dijelu otisnut je reflektujućim natpis carina/customs, u fluorescentno-bijeloj boji. Na ramenom dijelu nalaze se epolete koje su našivene i zakopčavaju se dugmetom. Vjetrovka je izrađena od dvoslojne tkanine sa uloškom koji je dugmadima prikačen za unutrašnjost vjetrovke.

Jakna je tamno sive boje sa termo uloškom koji je sa unutrašnje strane prikopčan dugmadima.

Na leđnom dijelu otisnut je reflektujućim natpis carina/customs, u fluorescentno-bijeloj boji. Na prednjem gornjem dijelu, sa lijeve i desne strane, su dva skriveno ušivena džepa, a na donjem dijelu su dva koso usiječena džepa. Jakna se kopča rajsferšlusom, sa preklopom koji se kopča dugmadima. Na dijelu pojasa jakne su dva reda lastiša. Rukavi se završavaju manžetnama koji se kopčaju dugmetom. Na ramenom dijelu se nalaze epolete koje su našivene i zakopčavaju se dugmetom. Termo uložak je postavljen pamučnom postavom u istoj boji kao što je postava jakne.

Na lijevom rukavu našiven je službeni znak Uprave.

Džemper je blago strukiran, od viskozne trikotaže u svijetlo sivoj boji, sa V izrezom, sa pojačanjem na rukavima, naramenicama koje se spajaju čičak trakom i određenim pojačanjem na ramenom dijelu. Na lijevom rukavu ušiven je službeni znak Uprave.

Pantalone su tamno sive boje sa termo uloškom koji se kopča dugmadima, bez manžetni, sa postavom od prirodnog materijala, sa dva koso usiječena džepa, jednim ušivenim džepom sa poklopcem pozadi, i sa po jednim našivenim džepom sa poklopcem u gornjem dijelu nogavica, koji se kopčaju sa po dva dugmeta. U predjelu struka su našivene gajke za kaiš.

Košulja dugih rukava, je blago strukirana, u svijetlo sivoj boji, izrađena od prirodnog materijala, sa sirovinskim sastavom od 98% pamuka i 2% elastina radi bolje pokretljivosti. U prednje gornjem dijelu sa lijeve strane nalazi se džep.

Košulja kratkih rukava je blago strukirana, u svijetlo sivoj boji, sa epoletama. Na prednjoj strani, sa lijeve i desne strane, našivena su dva džepa sa poklopcem i prorezom za olovku. Na lijevom rukavu našiven je službeni znak Uprave carina. Košulje su izrađene od prirodnog materijala, sa sirovinskim sastavom od 98% pamuka i 2% elastina radi bolje pokretljivosti.

Majica dugih rukava (polo) je tamno sive boje sa kragom i izrezom koji se kopča sa tri dugmeta, izrađena od prirodnog materijala, sa ramfom na krajevima rukava i pojasnom dijelu. Na prednjoj lijevoj strani majice izrađena je pojačana podloga na kojoj se kači identifikaciona pločica.

Na prednjoj desnoj strani majice izrađena je pojačana podloga sa čičkom na koju se vertikalno kači oznaka sa zvanjem carinskog službenika. Na leđnom dijelu otisnut je reflektujućim natpis carina/customs, u fluorescentno-bijeloj boji. Na lijevom rukavu našiven je službeni znak Uprave.

Majica kratkih rukava (polo) je tamno sive boje sa kragom i izrezom koji se kopča sa tri dugmeta, izrađena od prirodnog materijala, sa ramfom na krajevima rukava. Na prednjoj lijevoj strani majice izrađena je pojačana podloga na kojoj se kači identifikaciona pločica. Na prednjoj desnoj strani majice izrađena je pojačana podloga sa čičkom na koju se vertikalno kači oznaka sa zvanjem carinskog službenika. Na leđnom dijelu otisnut je reflektujućim natpis carina/customs, u fluorescentno-bijeloj boji. Na lijevom rukavu našiven je službeni znak Uprave.

Majica kratkih rukava je tamno sive boje okruglog izreza, izrađena od prirodnog materijala. Na leđnom dijelu otisnut je reflektujućim natpis carina/customs, u fluorescentno-bijeloj boji.

Kapa je kačketa, tamno sive boje, izrađena od prirodnog materijala, sa štitom i odgovarajućom postavom. Na prednjem dijelu kape, u sredini, nalazi se vezena službena značka Uprave. Na zadnjem dijelu nalazi se traka za podešavanje veličine kape.

Kapa vunena je tamno sive boje, izrađena od prirodnog materijala, klasičnog oblika, sa presavijanjem u donjem dijelu. Na prednjem presavijenom dijelu kape, u sredini, nalazi se vezena službena značka Uprave.

Cipele su poluduboke, gumenog đona sa povišenom šarom, nepromoćive, crne boje, postavljene prirodnom kožom i na pertlanje.

Čarape su deblje od prirodnog materijala, klasične, crne boje.

Kaiš muški za pantalone je od kvalitetne kože, klasičnog oblika, širine od 30 mm, crne boje, koji se kopča metalnom kopčom.

Rukavice su od prirodnog materijala, klasičnog oblika sa prstima, crne boje.

Radne rukavice su od sintetičkog materijala i kože, crne boje, sa pojačanjem u predjelu dlana.

U predjelu zgloba se zatvaraju širokom trakom na čičak.

Kombinezon je tamno sive boje, izrađen od materijala koji je vodootporan, otporan na ulja i masti, sa većim brojem džepova koji se zatvaraju metalnim kopčama. U visini struka je odgovarajuće suženje, sa lastišem sa strana. Na nadlaktičnom dijelu lijevog rukava nalazi se našiveni službeni znak Uprave. Na leđnom dijelu otisnut je reflektujuć natpis carina/customs, u fluorescentno-bijeloj boji.

Žensko radno odijelo

Član 16

Ŧenska vjetrovka je ista kao muška, blago ukrojena.

Jakna je ista kao muška, ženskog kroja.

Džemper je isti kao muški, ženskog kroja.

Pantalone su iste kao muške, ženskog kroja.

Košulja dugih rukava, je strukirana, u svijetlo sivoj boji, izrađena od prirodnog materijala, sa sirovinskim sastavom od 98% pamuka i 2% elastina radi bolje pokretljivosti. Košulja kratkih rukava, je blago strukirana, u svijetlo sivoj boji, sa epoletama. Na prednjoj strani, sa lijeve i desne strane, našivena su dva džepa sa poklopcem i prorezom za olovku. Na lijevom rukavu našiven je službeni znak Uprave. Košulje su izrađene od prirodnog materijala, sa sirovinskim sastavom od 98% pamuka i 2% elastina radi bolje pokretljivosti.

Majica dugih rukava (polo) je ista kao muška, ženskog kroja.

Majica kratkih rukava (polo) je ista kao muška, ženskog kroja.

Majica ženska kratkih rukava je ista kao muška, ženskog kroja.

Kapa je kačketa, tamno sive boje, izrađena od prirodnog materijala, sa štitom i odgovarajućom postavom. Na prednjem dijelu kape, u sredini, nalazi se vezena službena značka Uprave. Na zadnjem dijelu nalazi se traka za podešavanje veličine kape.

Kapa vunena je tamno sive boje, izrađena od prirodnog materijala, klasičnog oblika, sa presavijanjem u donjem dijelu. Na prednjem presavijenom dijelu kape, u sredini, nalazi se vezena službena značka Uprave.

Cipele su poluduboke, gumenog đona sa povišenom šarom, nepromoćive, crne boje, postavljene prirodnom kožom i na pertlanje.

Kišna kabanica je tamno sive boje, izrađena od gumene nepromoćive tkanine, prilagođena za nošenje preko službene odjeće. Na leđnom dijelu otisnut je reflektujuć natpis carina/customs, u fluorescentno-bijeloj boji.

Čarape su deblje, od prirodnog materijala, klasične, crne boje.

Kaiš ženski je od kvalitetne kože, klasičnog oblika, širine od 20 mm crne boje, koji se kopća metalnom kopčom.

Rukavice su od prirodnog materijala, klasičnog oblika sa prstima, crne boje.

Radne rukavice su od sintetičkog materijala i kože, crne boje, sa pojačanjem u predjelu dlana.

U predjelu zgloba se zatvaraju širokom trakom na čičak.

Kombinezon je tamno sive boje, ženskog kroja, izrađen od materijala koji je vodootporan, otporan na ulja i masti, sa većim brojem džepova koji se zatvaraju metalnim kopčama. U visini struka je odgovarajuće suženje, sa lastišem sa strana. Na nadlaktičnom dijelu lijevog rukava nalazi se našiveni službeni znak Uprave. Na leđnom dijelu otisnut je reflektujuć natpis carina/customs, u fluorescentno-bijeloj boji.

Dodatni djelovi radnog odijela

Član 17

Dodatni djelovi radnog odijela su:

- 1) opasać;
- 2) futrola za pištolj;
- 3) futrola za sredstva za vezivanje;
- 4) futrola za sprej sa nadražujućom supstancom;
- 5) držač za baterijsku lampu i priručni alat;
- 6) fluorescentni prsluk;
- 7) prsluk za spasavanje.

Opasać je crne boje, izrađen od kože sa metalnom kopčom na prednjem dijelu, standardne širine.

Futrola za pištolj, futrola za sredstva za vezivanje, futrola za sprej sa nadražujućom supstancom i držač za baterijsku lampu sa priručnim alatom izrađeni su od sintetičkog materijala crne boje.

Fluorescentni prsluk je izrađen od laganog materijala, žute boje, sa našivenim fluorescentnim trakama srebrne boje. Na prednjem lijevom dijelu prsluka je našiven službeni znak Uprave carina, a na leđnom dijelu prsluka otisnut je natpis carina/customs.

Prsluk za spasavanje, sa sigurnosnim pojasem, izrađen je u skladu sa standardima ISO 12401, prilagođen tijelu i odgovarajućim okovratnikom. Kopćanje je prilagođeno brznoj regulaciji i otpuštanju. Prsluk ima odgovarajuć sistem za naduvavanje koji se aktivira na 15 cm ispod površine vode i osiguran je od slučajnog naduvavanja.

Oznake na službenoj odjeći

Član 18

Oznake na službenoj odjeći su:

- službena značka;
- službeni znak - amblem;
- oznaka na epoletama;
- identifikaciona pločica.

Oznake na svečanom odijelu, pored oznaka iz stava 1 ovog člana, su i ukrasne zlatno žute trake na rukavima sakoa i to:

- četiri zlatno žute trake za radno mjesto direktora Uprave carina;
- tri zlatno žute trake za radno mjesto pomoćnika direktora;
- dvije zlatno žute trake za radno mjesto upravnika i načelnika.

Izgled oznaka i način postavljanja

Član 19

Službeni znak - amblem izvezen je na platnu i ušiva se na način predviđen ovim pravilnikom u skladu sa čl. 5, 6, 9, 10, 12, 13, 15 i 16 ovog pravilnika.

Oznakom na epoleti označava se zvanje carinskog službenika i to:

- 1) direktor - četiri trake zlatno žute boje širine 20 mm, sa razmakom od 5 mm, i četiri osmokrake zvjezdice zlatno žute boje postavljene u položaju romba, sa dva lovorova lista zlatno žute boje, postavljenih između traka i zvjezdica.
- 2) pomoćnik direktora - tri trake zlatno žute boje širine 20 mm, jedna traka zlatno žute boje širine 10 mm sa razmakom od 5 mm, i četiri osmokrake zvjezdice zlatno žute boje postavljene u položaju romba.
- 3) upravnik i načelnik - dvije trake zlatno žute boje širine 20 mm, dvije trake zlatno žute boje širine 10 mm sa razmakom od 5 mm, i četiri osmokrake zvjezdice zlatno žute boje postavljene u položaju romba.
- 4) šef ispostave - četiri trake zlatno žute boje širine 10 mm sa razmakom od 5 mm, i četiri osmokrake zvjezdice zlatno žute boje postavljene u položaju romba.
- 5) pomoćnik šefa ispostave i samostalni carinski inspektor I - četiri trake zlatno žute boje širine 10 mm, sa razmakom od 5 mm i tri osmokrake zvjezdice zlatno žute boje postavljene u položaju trougla.
- 6) samostalni carinski inspektor II - četiri trake zlatno žute boje širine 10 mm, sa razmakom od 5 mm i dvije osmokrake zvjezdice zlatno žute boje postavljene paralelno.
- 7) samostalni carinski inspektor III - četiri trake zlatno žute boje širine 10 mm, sa razmakom od 5 mm i jedna osmokraka zvjezdica zlatno žute boje.
- 8) viši carinski inspektor I - tri trake srebrne boje širine 10 mm, sa razmakom od 5 mm i tri osmokrake zvjezdice srebrne boje postavljene u položaju trougla.
- 9) viši carinski inspektor II - tri trake srebrne boje širine 10 mm, sa razmakom od 5 mm i dvije osmokrake zvjezdice srebrne boje postavljene paralelno.
- 10) viši carinski inspektor III - tri trake srebrne boje širine 10 mm, sa razmakom od 5 mm i jedna osmokraka zvjezdica srebrne boje.
- 11) carinik viši saradnik I - tri trake srebrne boje širine 10 mm, sa razmakom od 5 mm i tri osmokrake zvjezdice srebrne boje postavljene u položaju trougla.
- 12) carinik viši saradnik II - tri srebrne boje širine 10 mm, sa razmakom od 5 mm i dvije osmokrake zvjezdice srebrne boje postavljene paralelno.
- 13) carinik viši saradnik III - tri trake srebrne boje širine 10 mm, sa razmakom od 5 mm i jedna osmokraka zvjezdica srebrne boje.
- 14) samostalni carinik - tri trake srebrne boje širine 10 mm, sa razmakom od 5 mm.
- 15) carinik - dvije trake srebrne boje širine 10 mm, sa razmakom od 5 mm.
- 16) mlađi carinik - jedna traka srebrne boje širine 10 mm, sa razmakom od 5 mm.
- 17) pripravnik sa visokim i višim obrazovanjem - dvije trake bijele boje širine 10 mm, sa razmakom od 5 mm.
- 18) pripravnik sa srednjim obrazovanjem - jedna traka bijele boje širine 10 mm.

Oznake se prišivaju na epoletama vjetrovki, jakni, sakoa, odnosno navlače na epolette ljetnih košulja.

Identifikaciona pločica - kači se na srednjem lijevom dijelu vjetrovke, jakne, sakoa i lijevog džepa ljetnje košulje, pravougaonog je oblika, dimenzija 7x2 cm, zlatnožute boje, na kojoj je crnim slovima utisnuto ime i prezime carinskog službenika, ispod kojeg je crnim arapskim ciframa utisnut identifikacioni broj carinskog službenika iz službene evidencije.

Izgled oznaka iz stava 1 ovog člana dat je u Prilogu 1 koji je sastavni dio ovog pravilnika.

Trajanje službene odjeće

Član 20

Svečano odijelo sa sastavnim dijelovima od po jednog komada, carinski službenici koriste pet godina.

Pojedini djelovi carinske uniforme i radnog odijela traju:

- 1) vjetrovka (1 komad) - 4 godine;
- 2) radno odijelo (komplet) - 4 godine;
- 3) carinska uniforma-muška i ženska, zimska (2 komplet) - 5 godina;
- 4) carinska uniforma- muška i ženska, ljetnja (2 komplet) - 5 godina;
- 5) košulja muška i ženska dugih rukava (5 komada) - 2 godine;
- 6) košulja muška i ženska kratkih rukava (5 komada) - 2 godine;
- 7) kravata (2 komada) - 2 godine;
- 8) ešarpa- (2 komada) - 2 godine;
- 9) džemper- muški i ženski (2 komada) - 2 godine;
- 10) pullover (1 komad) - 2 godine;
- 11) majica dugih rukava (polo), muška i ženska (5 komada) - 2 godine;
- 12) majica kratkih rukava (polo), muška i ženska (5 komada) - 2 godine;
- 13) majica kratkih rukava, muška i ženska (5 komada) - 2 godine;
- 14) rukavice (1 par) - 4 godine;
- 15) radne rukavice (4 para) - 2 godine;
- 16) kapa-šapka- (1 komad) - 4 godine;
- 17) kapa- kačketa - (2 komada) - 4 godine;
- 18) kapa-vunena - (2 komada) - 4 godine;
- 19) cipele zimske i ljetnje, muške i ženske (2 zimska + 3 ljetnja para) - 4 godine;
- 20) čarape zimske i ljetnje, muške i ženske (6 pari) - 2 godine;
- 21) kaiš muški i ženski (1 komad) - 4 godine;
- 22) radni kombinezon (2 komada) - 4 godine.

Dodatni djelovi radnog odijela carinski službenici koriste osam godina.

Postupanje nakon isteka trajanja

Član 21

Nakon isteka rokova iz člana 20 ovog pravilnika, službena odjeća postaje svojina carinskog službenika koji ju je dobio na korišćenje.

Ukoliko službena odjeća postane svojina carinskog službenika, sa iste se skidaju sve službene oznake, koje carinski službenik vraća Upravi.

Službene oznake iz stava 2 ovog člana vraćaju carinski službenici koji su preraspoređeni na radno mjesto za koje nije predviđeno nošenje službene odjeće.

Vrijeme i uslovi nošenja službene odjeće

Član 22

Službena odjeća se nosi samo za vrijeme vršenja poslova službe, kao i u vrijeme odlaska i polaska sa radnog mjesta.

Službena odjeća mora biti čista i uredna, u kompletu i sa propisanim oznakama.

Službena odjeća ne može se otuđiti i koristiti u privatne svrhe.

Na carinskoj odjeći ne mogu se vršiti nikakve prepravke.

Evidencija

Član 23

Evidenciju o dodjeli službene odjeće, količini, rokovima upotrebe i broju dodijeljenih oznaka na službenoj odjeći vodi Uprava .

Prestanak važenja

Član 24

Danom stupanja na snagu ovog pravilnika prestaje da važi Pravilnik o službenoj odjeći carinskih službenika ("Službeni list RCG" broj 7/02).

Stupanje na snagu

Član 25

Ovaj pravilnik stupa na snagu osmog dana od dana objavljivanja u "Službenom listu Crne Gore".

Broj: 04-14221

Podgorica, 14. septembra 2016. godine

Ministar,
mr **Raško Konjević**, s.r.

NAPOMENA REDAKCIJE: Prilog u PDF formatu možete preuzeti klikom na sledeći link:

Prilog